

# Ny Valosoa sy hadihady

## 72 taona ny 12 desambra teo

### Vao mainka ao tsara ny Filoha Ravalomanana

Feno 72 taona katroka tamin'ny alahady 12 Desambra 2021 teo ny Filoha Marc Ravalomanana.

Salama tsara ny filohantsika, mbola mahavita mandeha lavitra, satria niara-nankalaza izany fotoandehibe izany tamin'ny vahoakan'i Toliara izy tamin'io alahady 12 Desambra 2021 io, vao haingana izy no tany Toamasina. Tsy tontosa anefa izay fanamarihana ny tsingerin-taona nahaterahany tany Toliara izay, noho ny hetraketraky ny fitondrana Rajoelina, nanao ny vahoakan'i Toliara tsy ho ao amin'ny Magro Andaboly.

Ireo mpanaraby matahotra fifidianana dia sahy mire-diredy hoe : efa tsy lasa intsony hono ny Filoha Ravalomanana, ka tokony hitsahatra amin'izay.

Ny tena marina amin'ireny sokajin'olona miteniteny foana ireny, dia menatra ny ratsy vitany tamin'ny fanonganana ny fitondrana nahavita nanala ny fahasahiranana nanjo ny vahoaka, satria hitampoko hitampirenena, f'izy mianakavy nandroba fahefana dia vao mainka nampidi-pahoriana ny vahoaka malagasy manontolo, sady mahafantatra tsara ireny kitoatoan'olona ireny, fa rehefa tafaverina eo amin'ny fitondrana ny Filoha Ravalomanana dia ho lasa ririn-dasa ny fahoriana nilomanosan'ny vahoaka.

Ny taona voasoratra ao amin'ny karapanondro no mitombo ny an'ny Filoha Ravalomanana, fa ny vatana mbola matanjaka, ny saina vao mainka matsilo, ny fahamatorana rahateo tsy ho lazaina intsony, fa arakaraky ny itomboan'ny taona, vao miha-mitombo izany fahamatorana izany, indrindra fa ho an'ny olompirenena kristianina.

Etazonia no firenena filamatra ho an'izao tontolo, ny Filoha Amerikana Joe Biden, feno 79 taona tamin'ny 20 Novambra 2021 teo, mbola misokatra tsara ny sainy ary mbola matanjaka tsara ny vatany, ny Filoha Ravalomanana indray izay mivelona amin'ny sakafo voajanahary, sy mitaiza ny tenany sy ny fanahiny

amin'ny finoana kristiana dia manatombo lavitra amin'ny filoha amerikana amin'ny fahavitrihana, ny Filoha Ravalomanana rahateo tsy vahiny amin'ny fomba fitaizambatana sy saina amerikana, ka tsy hahirana azy ny ampiahitra izay fomba vahiny mety hitera-bokatsoa, ny tombony ho an'i Dada koa dia madio ny rivotra iainana eto amintsika.

Tsy misy tokony hahiana ny amin'ny fiatrehan'i Dada ny fifidianana izay ho tanterahana afaka roa taona sisa. Tsy handaitra amin'ny vahoaka malagasy intsony ny fivoizana ny hevi-diso manao hoe, mila tanora ny fanarenana ny firenena, satria ilay nilaza azy ho tanora dia hita nibaribary fa nanao sain-jaza maroroka, na ny loha-maleminy aza tsy mbola mikatona hatramin'izao, matoa mbola mahavita mampidikizo ny firenena hatrany.

Tsy ilain'ny firenena intsony ny tanora lohampety sy mpamitaka amin'ny renty manadala ary zatra bontolo, noho izany mila mailo ny olompirenena rehetra, satria ankoatran'ny mpitondra ankehitriny izay efa tsy antanaina intsony, dia mety hisy indray ny anarana vao-vao haroso hisakanana ny fanarenana ho entin'ny Filoha Ravalomanana.

Noho ireo voalaza rehetra ireo dia tsy tokony hiroaroa saina intsony ny vahoaka malagasy, fa vao mainka aza azo antoka ny Filoha Ravalomanana ary tsy hisy haraka azy amin'ny fifidianana afaka roa taona, saingy mitaky asa amin'ny isambatan'olona ny fampahombiazana ny fandresena, ny takiana voalohany dia ny fitondrana am-bavaka ny fiainampirenena, ny aorian' izay dia ny fanamarinana ny anarana any amin'ny fokontany, satria ny taona 2022 no fanavaozana tanteraka ny lisi-pifidianana izay fanao isaky ny 10 taona, ka ny fisian'ireo mpanaty rankena ao amin'ny "Ceni" sy ny "Hcc" dia tsy hampalaikomana ny vahoaka malagasy efa dodona tanteraka hisitraka ny fampandrosoana ho entin'ny Filoha Ravalomanana.

Ny Valosoa

### Ivom-Panajariana an'Antananarivo sy ny Manodidina

## Voafidy fanindroany ny ben'ny tanàna Rado Ramparaolina

Voafidy fanindroany ho filohan'ny filankevi-pitantan'ny IPAM, na ny Ivom-Panajariana an'Antananarivo sy ny Manodidina indray, ny ben'ny tanànan'Ampitatafika Antananarivo Atsimondrano, Rado Ramparaolina. Ny IPAM dia misy mpikambana 38 ary ahitana kaominina miisa 33 ao anatiny, amin'ireo kaominina manodidina ny renivohitra. Izy ity dia zanaky ny tetikasa GUGA: Grand Urbanisme de Grand Antananarivo, miandraikitra ny fanatsarana ny fampidiran-ketra amin'ireo kaominina ireo, ny lafiny fitaterana, ny fidiovana sy ny fanadiovana. Mandrafitra ny PUD: Plan d'Urbanisme de Detail, na drafipanjarihana ny tany. Efa nitantana ity IPAM ity nandritra ny 2 taona ny ben'ny tanànan'Ampitatafika Rado Ramparaolina ary mbola hitarika an'izany mandritra ny 2 taona ho avy indray. Mbola name-trahan'ireo ben'ny tanàna amin'ny kaominina manodidina an'Antananarivo ny fitokisany izy. Efa notsidihan'ny mpanatanteraka ao amin'ny IPAM avokoa ireo kaominina mpikambana, nakana ny hetahetan'izy ireo ary izany dia havadika ho tetikasa, ka ny IPAM no mitady ny famatsiam-bola, izany hoe



Ny filohan'ny IPAM, sady ben'ny tanànan'Ampitatafika Atsimondrano, Rado Ramparaolina.

ity rafitra ity dia karazana mpanamora ny fifandraisana eo amin'ireo kaominina mpikambana sy ny mpamatsy vola. Misy karazany 3 ny lalam-bolany hoy ny Filoha Rado Ramparaolina, misy ny famatsiam-bola 3 tapitrisa Euro avy amin'ny AFD, sampan-draharaha Frantsay misahana ny fampandrosoana, hatramin'ny taona 2023. Mamatsy vola azy koa ny fitondrana, manome 1 hetsy Ariary isan-taona, ho an'ireo kaominina mpikambana. Ary ny lalam-bola faha-3 dia latsakembok'ireo mpikambana : Ariary 5 isan'olona mandrafitra ny kaominina. Ny IPAM amin'izao fotoana dia fikambana na Association mivantana amin'ny

vahoaka, na d'utilité publique, ary izany dia lany nandritra ny filankevitry ny ministra. Asa fohy ezaky ny fikambana ny famomezana ordinatera sy imprimante ary ny antsoina hoe consommable ho an'ireo kaominina mpikambana. Momba ny fahazoana ilay 3 tapitrisa Euro avy amin'ny AFD, mbola misy ny olana amin'ny kaonty amin'ny bankin'ny fikambana, noho ny fepetra mavesatra apetraky ny ministeran'ny fitantanam-bola momba izany, nefa tsy maintsy ho vitaina izany, hoy ny filohan'ny IPAM. Efa tafajoro koa ny fananganana ny birao maharitra.

Fa momba ny kaominina Ampitatafika Atsimondrano iadidiany, be ny zava-bita tamin'ity taona 2021 ity, hoy ity ben'ny tanàna voafidy tamin'ny lisi-tri Tiako i Madagasikara (TIM) ity. Teo amin'ny lafiny fanabeazana, nahavita efitrano sekoly vao-vao miisa 5 ny kaominina. Teo ny fahavitany ny lalana mirefy 2,6 km, fiarahamiasa amin'ny AFD Frantsay. Tamin'ny volana oktobra 2021, voalohany nahavelon-tena ny kaominina, satria nahavita nandoa ny karaman'ny mpiasa, voasahan'ny kaominina madiodio ny fandanianana ao amin'ny fiadi-

diana ny tanàna. 3 hetsy Ar amin'izao fotoana ny karama farany ambany ao amin'ny kaominina Ampitatafika Atsimondrano, ezahana hampakarina izany amin'ny taona ho avy hoy ity ben'ny tanàna ity. Nahazo fanampiana avy amin'ny fitondrana ihany koa ny kaominina, izay natokana amin'ny fampandehanan-draharaha. Ny hetra tambatra na impôts synthétiques dia tsy fanampiana na subvention hoy izy, fa vola miditra amin'ny kaominina nalain'ny sampan-draharahan'ny hetra dia tsinjairaina avy eo, ka 49,5% ny anjaran'ny kaominina. Tamin'ny fotoana nisian'ny rafitra Faritany hoy ihany ity olom-boafidy ity, nahatratra 60% izany, nefa amin'izao fotoana tsy misy Faritany izao, mbola 49,5% ihany, mihena noho izany hoy ihany izy ny vola miditra amin'ny kaominina. Zavatra hatao fohy ezaka ao amin'ny kaominina Ampitatafika kosa, ny fanohizana ny fanamboaran-dalana, ny fametrahana ireo jiro andalambe, fanaovana tetezana fohy, fampitomboana ny fitaovana hoentimiasa. Hahazo fiara vao-vao sy moto ny kaominina amin'ny taona ho avy 2022.

Isambilo

### VEHIVAVY TIM ANALAMANGA

## Nanamafy firaisankina, niara-nizara ny mamy tamin-dRavalo

Nomarihana ny alahady 12 desambra lasa teo ny vanin'andro nahaterahan'ny filoha Marc Ravalomanana, ka tany Toliara no nokasaina hankalazàna io andro manan-danja eo amin'ny fiainany io, ka efa niomana tamin'izany ny mpikatroka any an-toerana. Noho ny hasomparana nataon'ny manana fahefana teto amin'ny firenena dia tsy tanteraka araka ny niheverana azy ny fotoana. Na izany aza ny zavatra nisy dia tsy diso anjara tamin'ny fankalazàna ny andro nahaterahan'i Dada ny Vehivavy Tiako i Madagasikara (TIM), fa nisy ny hetsika natao tamin'izany tao amin'ny foiben-toeran'ny antoko TIM tao Bel'Air Ampandranana ny sabotsy teo. Fotoana ihany koa io, nanamafisan'ny Vehivavy TIM ny firaisankinan'izy ireo. Tonga marobe ireo vehivavy TIM, ka nahatonga solontena tamin'izany ny distrika rehetra mandrafitra an'Analamanga. Nanome voninahitra ny fotoana ny birao politika nasionaly, notarihan'ny mpikambana ao anatiny Julien Andriamorasata, sy Me Eloi Ratefimahefamiro. Natao izao fihaonana izao hoy ny mpitarika ny vehivavy TIM Analamanga Rahelisoa Arphine amin'ny maha fankalazàna ny andro nahaterahan'ny filoha nasionalin'ny TIM Marc Ravalomanana ; nefa eo ihany koa ny famondronana ny hery satria ny vehivavy dia isan'ny singa iray mandrafitra ny antoko Tiako i Madagasikara, isan'ny matanjaka, satria izy ireo no isan'ny tena mahatsapa ny maha sarotra ny fiainana ankehitriny, izay mianjady ao an-tokatranon'ny tsirairay. Tokana ny tanjon'ny vehivavy TIM dia ny hametraka ny filoha Marc Ravalomanana hitantana ny firenena indray. Nandritra ny fotoana dia niarahaba manokana ny filoha Marc Ravalomanana ny vehivavy TIM. Ho lava andro iainana anie i Dada, ary omeny fahasalamana satria ilaina hanarina firenena izay latsaka an-katerena ny tenany. Ankoatra izay dia nitaona ireo vehivavy manerana an'i Madagasikara ny vehivavy TIM Analamanga, mba hanangana ny vehivavy TIM any amin'ny faritra manerana ny Nosy fa fotoanany izao. Ny zavatra mahafaly dia efa mitsangana ihany koa ny vehivavy TIM Frantsa amin'izao fotoana izao. Ny solotenan'ny birao politika nasionaly Julien Andriamorasata raha nandray fitenena dia nankahery ny vehivavy TIM amin'ny fandanantena hananan'izy ireo hampiroboroboana ny antoko. Ny filoha Marc Ravalomanana hoy izy dia nitondra avo sy nampiakatra ny fiainan'ny Malagasy fony izy nitondra, ka miarahaba azy isika amin'izao tsingerrintaona nahaterahany izao. Vonona isika rehetra hamerina azy hitantana ny firenena indray. Nandritra ny fotoana moa dia niditra mivantana tamin'ny alalan'ny antso an-telefônina ny filoha Marc Ravalomanana na dia tany an-tany lavitra aza ny tenany nankehery sy nisotra ireo vehivavy TIM ary niara-nizara ny mamy tamin'ny Vehivavy TIM Analamanga isy ny niatrika ny fotoana.

Ny Valosoa

### TONONKALO

## Ny madio sy ny marina ary ny mangarahara

Ireto no efa tsy ao anaty rakibolan'ny mapara: Ny MADIO sy ny hoe MARINA ary ny MANGARAHARA. Teny telo manan-danja raha hitondra fanjakana, Saingy ho an'ny jiolahy dia toa niniana nofafana !

Tsy madio ny fitantanana amin'ny sehatra rehetra. Kolikoly no manjaka, miampy bizina voretra. Ireo akamakama hatrany no tolora, ampiadanina, Saingy ny olon-tsotra kosa, zara raha mihinan-kanina.

Tsisy marina amin'ny asa sy ny seha-panjakana. Itsabahan'ny mpitondra ny tontolom-pitsarana. Baiko midina no betsaka, tsisy ny fifampierana. Didy jadona no ataon'ireo mba manam-pahefana.

Tena tsisy, tena tsisy izany hoe mangarahara. Raha vao zany no resahina, miakatr'afy ny mapara. Dia hankaiza izany isika ? Mila ovàna ny tantara. Miantso anao ho tonga saina f'efa ho very i Gasikara !

IRINA HO TAFITA (08-12-21)